



آزات تاگ 1

Knowledge Struggle Victory



بلوچ اسٹوڈنٹس آرگنائزیشن آزاد

آزات

سگار پبلی کیشنز

تاک: 1

سرہال: آشوبی جہد کار

چاپ: اکتوبر 2021

گپال: Media@bso-azad.com

تند جاہ: bsoazad.site

ڈس: عطا شاد ڈگری کالج تربت

آشوبی جہد کار

آشوب ۽ جنرچی پے ۽ آشوبی جہد کار چو نین مردم بنت۔؟

آشوب یک انچیں سیاسی گالبند (اصطلاح) پے ۽ انچیں تاکتوریں شے پے کہ
 آیک سماج پے ۽ تہ ۽ درستال گیش مہلوک ۽ دلگوش ۽ سرجم وتی نیمگ ۽ آورت کنت۔
 مہلوک ۽ دلگوش ۽ سرجم وتی نیمگ ۽ آرگ ۽ بکی سوب ہا سماج ۽ آشوب ۽ لوٹ ۽ تقاضہ
 آنت۔ آشوب ۽ لوٹ ہما جاہ ۽ ودی بیت کہ اود ۽ ہستیں نظام سرجم ۽ بیکار بہ بیت ۽ آئی ۽
 تہ ۽ بدلی ۽ ہچ ڈولیں گنجائش مہ بیت، گڑا ہما جاہ ۽ آشوبی جنز دیم ۽ کابنت ۽ سرجمیں نظام ۽
 بدل کنگ ۽ لوٹ ۽ کن آنت۔ ہمے سرجمیں نظام ۽ بدل کنگ ۽ لوٹ مہلوک ۽ ہمے جنز ۽
 نیمگ ۽ دلگوش کنت ۽ ہمے جنز لس مہلوک ۽ جنز جوڑ بیت۔ ۽ آشوبی جنز ۽ لوٹ کسان
 کسانیں نہ آنت، کجام مہلوکے کہ پہ چوشیں جنزے ۽ پادکیت گڑا آئی ۽ وتی سرجمیں دنیا
 ببادیگ لوٹ ایت۔ اے جنزانی تہ ۽ مہلوک ۽ زند، مال ۽ مڈی، لوگ ۽ جاہ ہچ شے پشت
 نہ کپ ایت۔ وہدے یک سماج ۽ ہستیں بیکاریں نظام ۽ سرجم ۽ بدل کنگ ۽ گپ بیت

گڑاودے ہما ہستیں نظامء واہند گوں مز نیں جنجالاں آشوبی جنزانی دیمال دارگء جہدء
کن آنت، پے وتی ناکارامدیں نظامء رکینگء آوتی سر جمیں زورء جن آنت۔ چوشکہ دنیا
ہرچی کہ آشوبی جنز بوتگ آنت یا کہ ہست آنت آہانی تہ ء ہمے گندگ بیت کہ
اودء آشوبی جہد کاراں آشوبی جنزء نہاد (قیمت) ء وتی سر جمیں زند داتگ آنت یادیک ء
آنت۔

دومی جست ایش آنت کہ یک آشوبی جہد کارے جوڑ بوگ ء لوٹ چی آنت۔؟
یک آشوبی ء تہ ء چے پیہیں سپت بہ بنت۔؟ بگندے ہرچ مردے ء گور ء اے جُستانی جتا
جتائیں پسہ بہ بنت یلئے یک گپے تچک آنت ء آئی ء ہر کس زانت کہ آشوب یک سر جمیں
دنیا یے، یک سر جمیں چاگردے یا چوش بہ گش کہ یک سر جمیں نظامے ء پر ووش دیگ ء
یک نوکیں دنیا یے ٹہینگ آنت۔ آشوب ء او گام (نعرہ) ء بگندے ہرچ مردے بہ جنت
، ہر کسے پاد بیئت ء آشوبی جہد کارے ء داوا ء بہ کنت یلئے آشوبی تہنا ہما بوت کن آنت کہ آ
یک سر جمیں نظامے پر وشت دات بہ کن آنت ء آئی ء جاہ ء یک نوکیں نظام یے جوڑ کنگ

ء بودشت (صلاحیت) آنی واہند بہ بنت۔ یک ناکارامدیں نظامے ء یک نوکیں نظامے ء
 تہ ء بدل کنگ ء ہاتر ء وتی سرجمیں دنیا ء بہا بہ دینت، وتی زند ء زند ء کلیں زاتی لوٹ ء
 واہشتاں کر بان بہ کن آنت۔ چہ یک عام مردے ء جتایک آشوبی ڈسپلن ء آنی ء جتائیں
 سپتانی واہند بہ بنت۔

اے یک مزنیں سرہالے بگندے ایشی ء سر ء دگہ ہزاراں ء شرتریں چیز نبشتہ کنگ
 بوٹگ ء بلے مئے نبشتہ کنگ ء مول ء مراد مئے چپ ء چاگرد ء جاوہر آنت، مئے راجی جُجز
 انت ء مئے سیاسی چاگرد ء تہ ء آشوب ء آشوبی لیکہ ء سر ء گپ ء ترانے بندات کنگ انت
 ۔ مئے بنگلی مول ء مراد ایش انت کہ مئے ہستیں سیاسی چاگرد ء تہ ء آشوب ء نام ء سر ء
 ہرچی کہ رد آشوبی رویہ ہست آنت آہانی سر ء گپ ء تران بہ بیت۔ ماہمے سرپد بہ ایں کہ
 اے رد آشوبی رویہ سیاسی کینمر ء ڈول ء دراج کش بنت، اگاں ایشانی سر ء گپ ء تران
 بندات کنگ مہ بیت بگندے دیمتر ء مئے سرجمیں سیاسی چاگرد آشوب ء نام ء سر ء رد
 آشوبی رویہ آنی آماج بہ بیت۔

آشوبی جہد کارانی ہم بگندے ہزاراں بودشت ء نزوری بنت بلئے اے نبشتانک ء تہ ء تہنا
 لہتیں بنگلی ہا سیں چیزانی سرء گپ ء تران کن ایں ء ماہمے سر پد بہ ایں کہ ہمے چندے
 بنگلی چیزانی سرء گپ ء تران کنگ اے وہد ء المی انت۔

1- کمئنٹنٹ:

کمئنٹنٹ ء چہ مراد وتی کار یا لیکہ یے ء گوں سر جم ایماندار بوگ، پہ تنک ء دل،
 گوں مرگ ء زندیک کار ء پروگر اے ء سرء تچک ء اوشتگ۔ مردم چونائی ء زندمان ء تہ ء
 وتی یک چونیں مکدے اول جوڑ بہ کنت پہ آئی ء سر جم کنگ ء کمئنٹنٹ بوگ آئی ء بنگلی
 لوٹ انت۔ ابید ء کمئنٹنٹ ء مردم پہ وت ء زاتی روز گارے ہم کت نہ کنت ء آشوب ء
 آشوبی جہد باز مزینیں چیز انت۔ آشوبی جہد ء تہ ء مدام ہمے گندگ بیت کہ مردم کمئنٹنٹ
 ء سرء سک باز گپ کن انت۔ کمئنٹنٹ ء سرء بے کساس مزینیں لٹریچر ء تران
 (لیکچر) ہست انت۔ چہ ایشاں ہک کسے گوں اے گپ ء تپاک دار ایت کہ ابید
 ء کمئنٹنٹ ء کسے ہم آشوبی جہد کارے بوت نہ کنت۔

وہدے یک مردمے کہ سرجمیں چار ۽ بیچارے ۽ پد، وتی رزاء منشاء چہ یک آشوبی
جنزے ۽ بہر جوڑ بیت، گڑاھاروچ ۽ آئی ۽ راے گپ سرپد بوگی انت کہ نون منی زند ۽
مرگھے جنزے گون بندوک انت، جنزے ۽ چے پیہیں لوٹ ۽ گزانت آمن ۽ ییلوکنگ
کپ انت۔ ۽ گون ایمانداری ۽ منی وس ۽ چے کارے بیت، بیست ۽ چار کلاک من ۽ یہ
اے جنزے کنگلی انت، دمبرگ، پدکنزگ، دلپروش ۽ چک ۽ پد بوگ ۽ کہ نون منی گور ۽
مہ بیت۔ نون کہ راہ گپنگ آں بس روگی انت۔ ہمیشی ۽ گوش انت آشوبی کمئنٹنٹ سین
جہد کار۔

چہ آشوبی کمئنٹنٹ سین جہد کارانی زند ۽ جاوراں ہے زانگ کہ اے مردماں وتی زند ۽
درستیں لایچ سوگک انت ۽ جہد ۽ ہوار انت۔ اے مردم نہ یہ وتی زاتی زند ۽ سکون،
آسائش ۽ آرام ۽ اُمت دار انت ۽ نییکہ دگہ زاتی پائیدگ ۽ لایچ یے ایثانی گور ۽
ہست۔ ایثانی زند ۽ مرگ ہر دوہے جہد ۽ آشوب انت۔ اے چہ وتی سیاسی لیکہ ۽ سرپد ۽
سرجم تحکیس مردم بنت۔ اے مردم یک مزین چار ۽ بیچار ۽ جیڑگے ۽ پد گون وتی سرجمیں

سُجّ ۽ زانت ۽ اے جاہ ۽ سر بوتگ آنت کہ اگاں آشوبی جہدے کنگی انت گڑا سر جمیں
جہدے کنگی انت ۽ سر جمیں جہد ۽ ہاتر ۽ وتی سر جمیں زند کر بان کنگی انت۔

دومی نیمگ ۽ ماے ہم گندایں کہ آشوبی جہد ۽ تہ ۽ بازیں مردم هوار آنت ۽ کمئمنٹ ۽
گپ ۽ ہم کن آنت بلئے کمئمنٹ ۽ نام ۽ سر ۽ تہنا پارمالٹی (Formality) پورا کنگ ۽
آنت۔ اے مردم جہد ۽ هوار آنت ۽ آشوب ۽ گپ ۽ ہم کن آنت بلئے چہ ایشانی کار ۽ زمہ
واریاں همے زانگ بیت اے تہنا ود گوازینگ ۽ آنت۔ ایشی ۽ سوب چے انت۔؟ بوت
کت ایشی ۽ جتاہیں شکل بنت ۽ ماسد درسد ایشی ۽ راستیں شکلاں سر پدمہ بنیں بلئے لہتہیں
شکل کہ دیم ۽ کانت، چوشکہ بازیں مردم جہد ۽ تہ ۽ حادثاتی بستار ۽ هوار کپ آنت، بازیں
مردم راجدوستی ۽ جذبہ ۽ بنیات ۽ هوار کپ آنت بلئے چوشکہ آشوبی جنر ۽ کشک ۽ سپرسک
باز جنجال ۽ گران انت، مزین کار، کر بانی ۽ سگ ۽ او پارے لوٹ ایت، ۽ اے مردم کہ یہ
نازانتی ۽ هوار کپتنگ آنت یا کہ یہ زانت هوار کپتنگ آنت بلئے ایشانی گور ۽ کار کنگ ۽ کر بانی
دیگ ۽ جرات نیست انت، پیمیشکہ آشوبی جنر وہدے کہ سکتیں جاورانی آماج بیت، نوں

گڑا اے مردم (کہ کمٹنٹ نہ انت) ہوش کن آنت کہ چے بہ کن ایں۔؟ اء اے گپء
مولء مراد ایش نہ انت کہ اے مردم ہر ایں مردم بنت، اے مردم بگندے شریں
مردم آنت ء پے زمین ء راج ء مہر ء دوستی ء ہم دار آنت، کسان کسانیں کربانی ہم دیگ
لوٹ آنت بلے آشوبی جہد ء آشوبی کمٹنٹ چہ ایشانی وس ء ڈن ء چیز یے۔

بلے مے گور ء ماگند ایں کہ بازیں مردم آنت کہ جہد ء ہوار ء کپتنگ آنت، بلے آہانی تء
کمٹنٹ ء جرات نیست انت۔ یک نیمگے جہد ء گرانیں جاوراں او پارکت نہ کن آنت
ء دومی نیمگ ء بلوچی مڑا یے دار آنت کہ ہما مڑا ء سوب ء یکدم پد کنزرات ہم نہ کن
آنت۔ جی ء کہ بلوچ چہ شگلان ء ترس آنت، ہمے ہاتر ء گندگ بیت کہ اے مردم جہد ء تء
بیزاری پیش دار آنت، نوں وت ء گوں پارسائی ء یکر کنگ ء ہاتر ء جتا میں ہید پٹ آنت (تا
کہ مار ہم بہ مریت ء لٹ ہم مہ پرش ایت)، وتی زمہ واریانی سرء سنجیدہ نہ بنت، چہ کسان
کسانیں چیزاں دلپروش بنت، کسان کسانیں جیٹہانی سرء دومی مردماں انچو باور کناکینگ ء
جہد ء کن آنت کہ جہد ء گل ہراب آنت یا ایشانی پالیسیانی سبب ء ماد لپروش انت۔ اے

مردم ہمے ودارء کن آنت کہ جہدء تہء کجام جاہء کسانیں نزوری یے بنیت تاکہ ما آئیء
 جوازے جوڑ بہ کن ایںء و تارء چہ جہدء یک کش بہ کن یں۔ راستی ایش انت اے مردم
 یک و ہدےء دولانچء سوار بوگ لوٹ آنت۔ یکے پہ بلوچی مڑاہء جہدء ہوار بوگ ہم
 لوٹ آنتء دومی نیمگء زاتی واہشتء پُرسکونیں زندےء واگدار آنت۔ ہمے ہاترء
 اے مردم آشوبی جہدء نامء سرء تہنا پارمالیٹی سرجم کنگء آنت۔ چونکہ اے مردم گوں
 جہدء کمٹمنٹ نہ آنت ہمیشہ اگاں اے مردم آہانی کمیء کوتاہی آئی سرء جُستء پُرس
 کنگ بہ بنت یا گرء دار کنگ بہ بنت، گڑاہمے مردم در کپ آنتء جہدء ہلاپء اوشت
 آنت۔

یلئے آشوبی کمٹمنٹ یں جہد کار پارمالیٹی سرجم نہ کنت، بگندے گوں وتی سر جمیں سنجء
 زانتء جہدء ہوار بیت۔ آئیء گورء زند تہنا جہدء نام بیت، آکدی ہم دولانچاں سوار نہ
 بیت، آئیء گورء یک چیزے مدام بیت کہ اے جہد منی جہد انت، جاور چینکس سکت،
 چینکس نہ وشء گلگ بوت آنت، من اے کشکء وتی ہکء ادا کن آں۔ وت جہدء

منزل ء سر باں یا کہ نہ باں بلئے آئی ء یک آپرے ء سر کنگ ء جہد ء کن آں۔ آکدی ہم
 دلپروش نہ بیت، آئی ء زہن کدی ہم جہد ء بابت ء مان گیشنگ نیں ہیلانی آماج نہ بیت
 ، آسرجم تنچک ء سر جمیں جہد کارے بیت۔

2- ڈسپلن:

سیاسی یا آشوبی جنزانی تہ ء سماج ء عام مردم ء آشوبی جہد کارانی نیام ء زمین ء
 آزمان ء تپاوتے بیت۔ عام مردمانی تہ ء آشوب ء ہاتر ء جذبات بنت، جُزء ء ہرچ وڑیں
 کمک کن انت، جُزء ء وتیک لیک انت ء وتی بسات ء کربانی دیگ ء ہم ساڑی بنت، بلئے
 لس مہلوک آشوبی ڈسپلن ء پابند بوت نہ کنت۔ جی ء کہ پہ آشوبے ء آرگ ء ہاتر ء آشوبی
 ادارہ لوٹ ایت، ہمے ڈول ء آشوبی گل ابیدے آشوبی ڈسپلن ء سرجم بوت نہ کنت۔
 آشوبی جہد کارے لس مہلوک ء نیام ء یک جنگی تپاوتے ہمے ڈسپلن انت۔ لس مہلوک ء
 سیادی گول جذبات ء بیت، آجذبات کجام ہم وہد ء نزور بوت کن انت ء آئی ء ہمہرائی ء
 سیاسی تاکت (Political Power) ہم مہلوک ء جذباتاں کم ء گیش کنگ ء مزنیں

کر دے پیلو کنت۔ ہمے واستہ لس مہلوک آشوبی جنزانی سو بندا یا بے سوب بوگ ء
 میاریگ کنگ نہ بنت بلئے آشوبی جہد کار ء کرد جتانت۔ آشوبی جہد کار گوں سر جمیں عقل
 (conscious) ء زانگ ء جہد ء هوار بیت۔ آشوبی جہد کار جنز ء سو بندا ء بے سوبی
 ہر دو شکلائی زمہ واریاں وتی سر ء زورگ ء ساڑی بیت ء آشوبی جہد کار ء لیکہ گوں سیاسی
 تاکت ء مٹ نہ بیت، اگاں یک انجیں و ہدے جہد سک نزور بہ بیت، ریجن ء سر جمیں
 جاور جہد ء ہک ء مہ بنت، جہد وتی گڑی سہا ء سر بہ بیت بلئے آشوبی جہد کار گوں وتی
 سر جمیں وس ء واک ء اوشت ایت ء جنز ء گرانیں جاوراں چہ کش ایت ء دیروی دنت۔
 ایشانی بنگی سبب ایش انت کہ آشوبی جہد کار آشوبی ڈسپلن ء پابند انت۔

آشوبی ڈسپلن ء تہ ء جہد کار وتی زاتی تب ء واہشت ء اجتماعی پیسلانی سر ء کر بان کنت۔ چی ء
 کہ اگاں آشوبی ڈسپلن ء جاہ ء زاتی تب ء واہشت ارزشت دیگ بہ بنت گڑا آشوبی گل ء
 جُزپشت نہ کپ انت۔ آشوبی جہد کار ہمے ہاتر ء آشوبی جہد کار شنگ بنت کہ آہانی نریک ء
 ادارہ، ادارہ ء نظر یہ ء کمد چہ کلاں بالا بنت۔ اگاں ادارہ (یا گل) ء تہ ء انجیں پیسلہ بنت کہ

آپیسلہ زاتی ہساب ۽ منی تب ۽ ہلاپ بنت بلئے گل ۽ گوں دلیل ۽ گپ ۽ تران ۽ آپیسلہ
 زرتگ انت گڑا آپیسلہ ۽ سرجم کنگ منی ڈسپلن ۽ بہر انت۔ اگاں آشوبی جہد ۽ تہ ۽ یک
 سنگتے آشوبی ادارہ یے ۽ بہر انت بلئے آشوبی ڈسپلن ۽ پابند نہ انت، گڑا آئی ۽ بے مہاری ۽
 اسر گل ۽ تہ ۽ گندگ بنت۔ آسگت مدام وتی زاتی واہشتناں ارزشت دنت، بز انکہ تب
 بیت کار کنت ۽ اگاں تب نہ بیت کار نہ کنت۔ وتی زرتگیں زمہ واریانی سر ۽ گیر سنجیدگی
 پیش دارگ، سر جمیں گل ۽ تہ ۽ انچیں ماحولے جوڑ کنگ، اختلاف ۽ تنقید ۽ نام سر ۽ گل ۽
 سیادی داریں جاہ ۽ گپ نہ کنگ، چہ سیادی داریں جاہ ۽ ڈن گپ جنگ، سنگتانی نیام ۽ بے
 بیہ ۽ دلپروشی پیدا ک کنگ۔ گوں وتی گیر آشوبی رویہ ۽ انچیں بیزاری پیش دارگ ۽
 نزوریانی جاہ ۽ گل ۽ میاریگ کنگ، کہ جُز ۽ گل بے سوب انت، آئی ۽ لیڈر شپ بے سوب
 انت ۽ اد ۽ ہج آشوب اتک نہ کنت، دگہ انچیں بے سر ۽ پادیں گپ ۽ گال پیدا ک کنگ۔
 اد ۽ یک گپے دلگوش کنگ بہ بیت گنگ ۽ مراد ایش نہ انت کہ آشوبی گلائی تہ ۽ سیاسی
 ڈسکیشن مہ بیت یا اختلاف ۽ تنقید دارگ مہ بیت، سیاسی ڈسکیشن یا اختلاف ۽ تنقید باز
 الی شئے انت بلئے کجام مردم ڈسپلن ۽ پابند نہ بنت گڑا آگل ۽ وتی زاتی تب ۽ واہشتانی سر ۽

دیم ۽ برگ لوٹ آنت، اگاں آہانی واہشت منگ مہ بنت، گڑا آوتی کارانی تہ ۽ نزوری پیش
 دار آنت، وتی زمہ واریاں سرجم نہ کن آنت، گوں ہما ادارہ ۽ کہ بندوک آنت آئی ۽ سیادی
 داریں جاہ ۽ گپ نہ کن آنت، مدام چہ ادارہ ڈن گپ کن آنت ۽ آہانی اختلاف ۽ تنقید ۽
 مول ۽ مراد ادارہ ۽ کارانی تہ ۽ گہتری آرگ ۽ نہ بیت بگندے ادارہ تہ ۽ دلپروشی پیدا ک
 کنگ، سنگتانی نیام بے بیسہ ۽ پیدا ک کنگ انت کہ چوشیں رویہ دیم ۽ کار آنت ۽ اے
 رویہ گل ۽ تحریک ہر دواں ہلاس کن آنت۔

ہمے ہاتر ۽ پہ آشوبی جہد کارے ۽ بوگ ۽ گل ۽ ڈسپلن ۽ سرجم ۽ پابند بوگ الہی انت۔ اگاں
 کجام اوں مردمے زانت من آشوبی ڈسپلن ۽ پابند بوت نہ کن آں، گڑا باند انت کہ آوت
 آشوبی گل ۽ بہر جوڑ مہ بیت ۽ آشوبی گل ۽ زمہ واری ہم ہمیش انت کہ یک جہد کارے
 چینکس ہم مخلص یا زانکار بہ بیت بلے اگاں آگل ۽ ڈسپلن ۽ پابند بوت نہ کنت، گڑا آئی ۽
 چچ ڈول ۽ گل ۽ بہر جوڑ کنگی نہ انت۔

3- مجرت:

آشوبی جہد کار سرجم ء سرپد، زانتکار ء سنجید ہیں مردم بنت، ہمے ہاتر ء آہانی
 ہرچ گام گوں سیاسی مجرت ء بندوک بیت۔ ابیدے سیاسی مجرت ء آشوبی جہد کاروتی تہ ء
 سرجم بوت نہ کنت۔ چوشکد آشوبی جہد ء تہ ء پُر سکون ء پُر ایمنیں ماحول ء ہج ڈولیں امیت
 دارگ نہ بیت، بگندے پہ آشوبی جہد ء جاور مدام نگیگ بنت، ہمے نگیگیں جاوراں پہ جہد ء
 برجاہ دارگ ء ہاتر ء پیسلہ زورگ ء لوٹ بیت، اگاں یک جہد کارے نگیگیں جاوراں پیسلہ
 زرت نہ کنت ء مدام کنفیوز (چوش بہ کن آں یا مہ کن آں، چوش بیت یا نہ بیت۔؟) بہ
 بیت، گڑبزانکہ آئی ء تہ ء سیاسی مجرت نیست انت۔ اگاں کجام ہم جہد کارے ء زہن ء تہ
 ء مدام تاوان ء ترس بوت ء ترس ء سبب ء آئی ء پیسلہ زرت نہ کنت گڑا آجہد کار آشوبی جُز
 ء بہر بوت نہ کنت۔ اے گپ راستے کہ پہ آشوبی جُز اں جاور مدام نگیگ بنت ء
 اود ء تاوان ء گنجائش گیش بنت بلے اے ہمے سیاسی مجرت انت کہ آشوبی جہد کاراں
 گران ء سکتیں جاوراں مزینیں پیسلہ زورگ ء توکل دنت، بزانتکہ چونیں گرانیں وہد ء

مز میں پیسلہ زور ہے، تاوان ہے گنجائش ہے کمتر کنگ ہے جہد کن ہے۔ آشوبی جہد کار ہے تہ ہے
 وہدے سیاسی جُرت بیت اگاں سر جمیں جاوڑ آئی ہے ہلاپ بہ بنت بلئے آوتی زر تگیں پیسلہ
 ہے سرء اوشات کنت۔ ادء اے گپ ہے گیشینگ الم انت کہ پیسلہ ہے سرء اوشنگ ہے مراد زد ہے
 اکانہ انت بگندے سیاسی سنج ہے زانت انت۔ ہما پیسلہ کہ گول سر جمیں سنج، زانت، رہند ہے
 دلیل ہے گول زر تگ گڑا آپیسلہ ہے سرء ہرچ ڈول ہے اوشنگ لوٹ ایت۔ اگاں دومی نیگ ہے
 جاوڑ چینچو ہم تگیگ بہ بنت ترس، لالچ یا پائیدگ چینکس گیش بہ بنت بلئے یک آشوبی جہد
 کارے وتی زر تگیں پیسلہ ہے سرء اوشت ایت۔

آشوبی جہد سر جم ہے گول کار رہندانی بنیات ہے بیت۔ ابیدے رہندے ہے آشوب بگندے
 آشوبے نہ بیت۔ دوستی ہے نہ دوستی، شر ہے ہراب، کسان ہے مزن آشوبی رہند پہ درستاں یک
 ہساب بنت۔ آشوبی جہد ہے تہ اگاں تئی چمانی روک ردانت گڑا ردانت۔ ہمے ہاتر ہے یک
 آشوبی جہد کار ہے تہ ہے سیاسی جُرت ہے بوگ الم انت۔ سیاسی جُرت نہ بوگ ہے یک چیدگے
 ایش انت کہ وہدے یک جہد کارے گند ایت آئی ہے ہمہرا ہے، سنگتے یار ہشون یے رد

انت ء آئی ء ردی ء چہ گل ء مجز تاوان ورگ ء انت بلئے آجہد کار گل ء دیوان ء تہ ء وتی
سنگت ء جسٹ گپت نہ کنت ء نہ دیم پہ دیم سنگت ء گوں اختلاف داشت کنت بلئے باپشت
ء یادومی سنگت ء گور ء سنگت ء نزوریانی سر ء گپ کنت۔ اے رویہ ء تاوان ایش انت کہ
کجام سنگت ردانت آئی ء تئی داشتگیں اختلاف یا تنقید سر بوگ ء نہ انت، وہدے آئی ء سر
بوگ ء نہ انت گڑا آتی نزوریاں نہ ماریت، نزوریاں نہ ماریت نزوری ہلاس نہ بنت
۔ دومی نیمگ ء اے عمل ء تاوان ایش انت کہ یک سنگتے ء بارو ء دگہ سنگتانی گور ء گپ
کنگ ء چہ یک سنگتے ء زہن دومی سنگت ء ہاتر ء ہراب کنگ بیت، سنگتانی نیام ء بدلی
پیدا ک بیت، سر جمیں گل ء تہ ء ہھے وڑیں منافقی ء ماحولے جوڑ بیت ء سر جمیں ادارہ ء
جُرت ہلاس بیت۔ اگاں کجام جہد کارے دیوان ء تہ ء اختلاف داشت نہ کنت یا ہاسنگت
ء گوں دیم پہ دیم اختلاف داشت نہ کنت گڑا براں آ سنگت ء تنقید ء اختلاف پہ گل ء
سنگتانی گہتری ء نہ بنت بگندے پہ دومی سنگت ء ہاتر ء بد اعتمادی پیدا ک کنگ ء بنت۔
اے وڑیں جاوراں سنگتانی نیام ء وت سر ء وت دلپروشی پیدا ک بیت ء سر جمیں گل ء
ماحول ہھے رد آشوبی رویہ یا مناپکی ء آماج بیت۔ پہ آشوبی جہد کارے ء الم انت کہ اگاں

آئی ء سنگتے رَدانت گول سر جمیں سیاسی جُرت ء وتی سنگت ء دیم پہ دیم یا گل ء دیوان ء
جست بہ کنت یا اختلاف بہ دارایت ء تنقید بہ کنت۔ دیم پہ دیم جُست گرگ ء یا گل ء
دیوان ء تہ ء جُست گرگ ء چہ سنگتانی نیام ء آشوبی سیادی مہکم بنت، سنگت یکے، دومی ء
سر ء بیہ کن انت۔ آشوبی جہد کار یک گپے مُدام وتی زہن ء بہ کنت کہ جُست گرگ،
اختلاف دارگ یا تنقید کنگ ء مول ء مراد وتی سنگت ء جہل جنگ ء ہاتر ء مہ بیت بگندے
آئی ء گہتری ء ہاتر ء بہ بیت۔ پہ در ستیں آشوبی جہد کاراں الم انت اگاں آشوبی جہد بہر
انت گراوتی تہ ء سیاسی جُرت پیدا کہ بہ کن انت، اگاں سیاسی جُرت پیدا کہ نہ کن
انت بانید انت کہ سیاسی ء آشوبی جُزء بہر مہ بنت۔

4- دور چاری:

آشوبی جہد کیے و باز گران بنت ء دومی و ہدء حساب ء باز دران بنت، مدت جن
انت۔ ہمے ڈول ء کہ آشوبی جہد تہ ء پہ کربانی دیگ ء ہچ وڑیں کساس نیست، ہمے پیم ء
وہد ء زمانگ ء ہم ہچ ڈولیں کساس نیست۔ ہمے واستہ گش انت کہ آشوبی جہد کاراں

دور چار بوتگی انت۔ آشوبی جہدء پروگرام جوڑ کنگ ء پہ الم انت کہ آتی سر جمیں گوست ء
 بہ وان انت، مرو چگیں جاوراں سرجم ء سرپد بہ بنت ء پہ باندا ت ء پروگرام جوڑ بہ کن
 انت۔ مرچی آہانی زانت ء تہ ء بہ بیت کہ آؤکیں کم ء چہ کم دہ سالانی تہ ء چے بوت
 کنت۔ اگاں ناباندا ت ء پروگرام سرء جیرڈگ مہ بیت ء اے گنگ بہ بیت کہ باندا ت
 ہرچی بیت پد اباندا چارایں گڑ ابرانکہ آجہد ء باندا ت نیست۔ مئے گور ء چوشیں بازیں
 سوچ ہست انت، پہ درور "باندا ہرچی بیت، باندا چارایں یا کہ باندا اللہ مالک یے، کاروت
 شر بنت، ہیر بیت۔" اے سرجم ء وت گیر آشوبی نیں پگر انت۔ بلئے وہدے کہ آشوبی جہد
 کار دور چار بنت گڑا آباندا ت ء ہرچ وڑیں جاوراں وتی بزاں بجزء ہک ء کار مرزکت کن
 انت۔ دور چار یں جہد کار ہرچ وڑیں نگلیکیں جاورانی دیم یہ دیم بوگ ء واستہ پیسر ء ساڑی
 بنت، آ اے گپ ء سرپد بنت کہ جاور روتچ پہ روتچ گران بنت ء ہمے گرانیں وہد ء واستہ
 پیسر ء وت ء تیار کنگی انت۔

اگاں جہد کار دور چار نہ بوت آنت، گڑا جاورانی مٹ بوگ ۽ همبرائی ۽ آہانیھیال ۽ لیکہ ہم
 مٹ بنت یاد ژمن ۽ جوڑ کنگلیں ماحول ۽ چه اسر مند بوت کن آنت۔ چوشک دژمن بازو ہد
 سیاسی تاکت ۽ حساب ۽ سیاسی ماحولے ۽ تہ ۽ انچیں بدلی پیش دارایت کہ آئی ۽ ہلاپ جنگ
 کنوکیں جہد کار ہم اسر مند بنت۔ کجام جہد کار چیزانی سرء دور چار نہ بوت آنت، گڑا آہانی
 گور ۽ اے امکان بیت کہ دژمن ۽ جوڑ کنگلیں ماحول یا جہد ۽ تہ ۽ آؤکیں سکتی آہان ۽ تاوان
 بہ دینت۔ ایشی ۽ ہوار آبازیں گیر ضروری یں کسان کسانیں جیڑھاں گوں مان گیش آنت،
 آہانی گور ۽ ہرچ کسانیں گپ ۽ ہرمانا دار آنت۔ ہرچ کسان کسانیں گپ ۽ ہرماں جیڑہ
 جوڑ کن آنت گڑا آہانی دلگوش چه جہد ۽ مکسد ۽ دور بو ان بیت۔ و ہدے کہ آہانی دلگوش چه
 جہد ۽ مکسد ۽ دور بو ان بہ بیت گڑا آکسانیں جیڑہ ۽ جنجالے ۽ دیم ۽ آہگ ۽ گوں چه جہد ۽
 پدکنز بنت۔

چه آشوبی جہد کاراں آشوب ۽ ایدگہ لوٹاں ہوار "دور چاری" ہم یک ہا سیں

پدگے، آشوبکاراں لوٹ ایت کہ مدام گوں دور چاری ۽ بہ جیڑہ آنت، وتار ۽ چه کسان

کسانیں، وت ماں وتی یا اید گہ جیڑہ ۽ جنجالاں بہ پہریز آنت۔ وہدے کہ آ "دور چار" بینت
گڑا آہانی گور ۽ کدی ہم کسان کسانیں گپ ۽ ہبر جیڑہ جوڑ نہ بنت۔ آہانی گور ۽ اے کسان
کسانیں گپ مانا نادر آنت، بگندے آشوبی آنی گور ۽ تہنا آشوب ۽ آئی ۽ مکسد اہم بنت،
آہانی سگ ۽ او پار کچ سک باز من بیت، آہچ و ہداں ری ایکشتری نہ بنت، بگندے آہر
جیڑہ ۽ گوں او پار ۽ زانت ۽ گیشین آنت۔ آوتی ہمہراہیں سنگتانی کسان کسانیں زوریاں
جیڑہ جوڑ کنگ ۽ جاہ ۽ ہمے زوریاں گوں ہاموشی ۽ سر ۽ گیشین آنت ۽ ہلاس کنگ ۽ جہد ۽
کن آنت۔ جی ۽ کہ آزان آنت کہ وتی سنگتانی کسان کسان زوریاں زورگ ۽ مز نیں جیڑہ
جوڑ کنگ ۽ چہ سر جمیں سنگتانی دلگوش جہد ۽ چہ دور کیت ۽ ہمے وڑیں کسانیں جیڑہاں گوں
مان گیش ایت۔ بلے وہدے کہ آسر جم دور چار بنت گڑا آہانی سر جمیں ہیال گوں وتی جہد
۽ مکسد ۽ گور بیت، آکدی کسان ۽ مز نیں جیڑہانی بنیات ۽ جہد ۽ چہ دلگراں ۽ دلپروش نہ
بنت۔ آشوبی جہد کار ہمے ہاتر ۽ آشوبی آنت کہ ہرچ وڑیں بزاں وش ۽ نہ وشیں جاوراں
جہد ۽ وتی لیک آنت ۽ ہرچ وڑیں جاوراں کیلیں داب ۽ جہد کن آنت۔ دور چاریں آشوبی
جہد کار چہ ہچ وڑیں جاوراں دلپروش ۽ بے زار نہ بنت۔ بگندے آجہد کار کہ کسان کسانیں

جیڑہانی سرء دلپروش ء بیزار بنت گڑا بزانکہ آ آشوبی نہ انت، آدمبر تگیں جہد کار انت ء
 جہد ء چہ مچک لوٹ انت۔

5- نرگسیت:

آشوبی جہد کار وتی زات، وتی دنیا ء وتی چند ء تب ء واہشتناں چہ مدام بُر ز تر جیڑ
 انت۔ آہانی نرگس ء چہ آشوب ء ہاتر ء چہ وتی زات ء در کپگ ء وت ء اجتماعیت ء میار کنگی
 انت۔ اگان آشوبی جہد ء تہ ء کجام ہم جہد کارے وت ء، وتی زانت ء پمیلہاں، وتی تب ء
 واہشتناں وتی ہمبہراہ ء سنگتاں چہ بُر ز تر بہ لیک ایت بزاں آ جہد کار نرگسیت ء آماج انت۔
 نرگسیت ء آماجیں جہد کار آشوبی جہد ء تہ ء رد آشوبی رویہ جوڑ کن انت۔ نرگسیت ء آماجیں
 جہد کارے نہ انت کہ تہنا وتی ہمبہراہاں پیش دار ایت کہ من یک زانتکارے آن بگندے
 آوت وتی زات ء ہم ہمے باور کنائین ایت کہ من وتی در ستیں ہمبہراہاں چہ گیش زانت
 کاراں۔ آئی ء نرگس ء چیزے ء نہ زانگ یا چہ دوئی ء کتر زانگ بلاہیں امیب یے۔ بلئے
 راستی ء نہ زانگ امیب یے نہ انت، شتریں سر پد ء زانتکاریں مردم نہ زانگ ء یک امیب یے

سرپد نہ بنت بلئے نرگسیت ء آماجیں مردم ایٹی ء ایب یے سرپد بنت۔ اے نادراہی ء
 آماجیں جہد کار برے وتی کرد ء برے وتی گپاں چہ ہمے پیشد ارگ ء جہد ء کن آنت کہ ماوتی
 ہستیں کلیں ہمہرہاں چہ گیش لائک ء زانکارایں، چرہاں گیش چیزاں سرپد بتیں، ہمے
 ہاتر ء اے ہستیں ہمہراہ ء سگت مارائے کچ ء بالائیں اڑت ء شرپ بہ دینت۔ اگاں
 سیاسی دیوان ء مجلسے ء تہ ء نرگسیت ء آماجیں نادراہ ء گپ رد کنگ بوت یا کہ آئی ء دیم ء
 سگت ء منانک گیش ہمکم بوت، گڑا اے نادراہ ہمے گپ ء سک بد بارت، بگندے نہ ہتہنابد
 بارت بگندے آئی ء وتی زات ء سر ء اڑتے سرپد بیت۔ اے وڑیں مردمانی زہن ہچر اے
 گپ ء باور نہ کنت کہ دیوان ء مجلسانی تہ ء من ء چہ گیش دگہ کسے زانکار بہ بیت یا کہ چہ
 من ء گیش کسے اسر بہ دارایت۔ ہمے وڑاے تب ء مردم سیاسی ڈسکیشن ء چوٹینگ ء وڑے
 کار مرزکن آنت بزائکہ وتی ہیال ء لیکہ ء دیم ء مردم ء سر ء پہ زور مُش آنت، آئی ء ہیال ء
 لیکہ چنچو ہم رد بہ بیت یا کہ آئی ء چنچو ہم دروگ گون بہ بیت بلئے اے چیز آئی ء گور ء مانا
 نہ دار آنت، آئی ء ہتہنادیوان ء مجلساں وتی دانشوری پیشد ارگی انت، کہ من چینکس یں
 زانکارے آں۔

چونائی ء آشوبی جہد کار چہ وقتی زات ء نام ء باز برتر جہد انت، آہانی گور ء آہانی زات ء نام مانا نہ دار انت، بلئے اے نادراہی ء آماچیں جہد کار آشوبی جہد ء تہ ء ہم کریڈٹ زورگ ء جہد ء کن انت۔ کریڈٹ زورگ ء مراد ہر چ کار ء گوں وقتی زات ء بندوک کنگ یا وقتی زات ء نام ء کنگ کہ اے کار من کنگ، اے کار منی برکت انت کہ بوگ ء انت، اے منی سنگت انت، اے منی تربیت کنگ میں سنگت انت، اے شریں کار ء من گشتنگ بہ کن ات، اے سنگت منی برورد ء مروچی اے جاہ ء سرانت۔۔۔۔۔ اے سر جمیں جہد ء کریڈٹ ء جنگ یے سر پد بنت ء انچو کش ء اے مدام میدان ء یہ کریڈٹ ء گرگ ء مچگ ء انت۔ اگاں کجام جاہ ء اے مردماں کریڈٹ نہ رست، گڑا اے مردم وت ء بے سوب سر پد بنت ء زوت یک عملے ء رد عمل ء چیزے کن انت۔ بز انکہ ہمے ڈول ء ری ایکشری ہم بنت۔

اے نادراہی ء دگہ یک ہرابی یے ایش انت کہ اے وڑیں مردم جہد ء تہ ء یہ ہما جہد ء سنگت جوڑ کنگ ء جاہ ء یہ وت ء پالور جوڑ کنگ ء جہد ء کن انت۔ اے وقتی دل ء وقتی

سنگت ۽ همبرہاں وتی پالور سر پد بنت۔ وتی ہمے سوچ ۽ بنیات ۽ ایشانی مدام ہمے جہد ۽
کوشت بیت کہ ماچون گیش ۽ گیش وتی همبرہاں سنگتاں چہ وت ۽ اسر مند بہ کن ایں ۽
آہاں وتی پالور جوڑ بہ کن ایں۔ اے وتی جنده ۽ سنگت ۽ همبرہاں چہ وتی زات ۽ اسر مند
کنگ ۽ ہاتر ۽ وتی تہ ۽ ہما بودشانی پیش دارگ ۽ جہد ۽ کن آنت کہ راستی ۽ آہانی تہ ۽ اے
بودشت نیست آنت۔ یہ زور وتار ۽ زانکار، ادیب، شاعر، نبشته کار ۽ شہزانت پیش دار
آنت۔ اے ہمے نادراہی ۽ همینکس آماج بنت کہ وتی زات ۽ زاتی بستار ۽ ہج ڈول ۽ جہل
پیشدارگ ۽ نئیل آنت، چریشی ۽ اگاں آہاں دروگ بندگ کپت، یا کہ دگہ چیزے لوٹ
ات، یہ وتی نام ۽ ہاتر ۽ آھرچ حساب ۽ اوشت آنت۔ جی ۽ کہ نرگسیت ۽ نادراہی ۽
آماجیں جہد کار مدام وتی زات ۽ بندوک انت ہمے ہاتر ۽ آئی ۽ ہاتر ۽ اے گپ سک
ارزشت دارایت کہ جہد ۽ تہ ۽ منی پوزیشن چی انت؟ آکدی ہم اے گپ ۽ نہ جیرٹایت
کہ آشوبی جہد ۽ تہ ۽ منی پرز ۽ زرمہ واری چی آنت ۽ من ۽ ابیدے نام ۽ زات ۽ وت ۽ کربان
کنگ لوٹ ایت۔ بگندے آئی ۽ سر جمیں وس ۽ واک ہمے گپ ۽ سر ۽ بیت کہ اے جہد ۽
منی پوزیشن چی انت، چینکس مردم ۽ ادارہ منی دست ۽ چیر ۽ آنت، چینکس مردم من ۽ پالو

کن آنت، چینکس مردم من ۽ گوش دار آنت۔ آئی ۽ وس ۽ واک گل ۽ جنزہ ۽ مہکم کنگ ۽ جاہ ۽ وتی پوزیشن ۽ مہکم کنگ ۽ سر ۽ ہرچ بنت۔ چونائی ۽ آوتی سنگت ۽ مردمانی دیم ۽ وتی ہرچ عمل ۽ ھے وڈ منارینگ لوٹ ایت کہ منی اے سر جمیں عمل پہ تحریک ۽ مہکم کنگ ۽ ہاتر ۽ آنت بلئے آئی ۽ کرد ۽ عمل آئی ۽ راستی میں بستار ۽ وت چک کن آنت، کہ آئی ۽ عمل چینکس پہ تحریک ۽ مہکم کنگ ۽ ہاتر ۽ آنت ۽ چینکس آئی ۽ وتی زات ۽ ہاتر ۽ آنت۔ ۽ اے نادر ای ۽ مسترین نادر ای ایش آنت کہ اے نادر ایں جہد کار کدی ہم اے گپ ۽ نہ مار ایت کہ من اے نادر ای ۽ آماج آل ۽ اے نادر ای آشوبی جہد ۽ ہاتر ۽ چہ کینسر ۽ گیش ترسناک آنت۔

6- جذبات ۽ احساسات:

آشوبی جہد مدام گوں سر جمیں عقل ۽ کنگ بیت، سر جمیں عقل ۽ مراد آشوبی جہد کاراں جذبات ۽ احساسات ۽ بنیات جہد کنگی نہ آنت، بگندے مدام گوں عقل ۽ کار کنگی آنت۔ اے گپ ہم راستے کہ ابیدے جذبات ۽ احساساتاں مردم سر جم نہ آنت، مردم ۽

ھرچ پیسلہانی تہ آئی ء جذبات ء احساساتانی کردے ہست انت۔ اگاں جذبات ء احساساتاں ہلا س بہ کن ءے تاں مردم تہنایک مشین یے ء بستار ء پشت کپ ایت ، بلئے سیاسی ء آشوبی جہد ء تہ ء پیسلہ سازی (Decision Making) مدام گوں عقل ء بنیات ء کنگ بہ بیت ، اگاں پیسلہ سازی گوں عقل ء کنگ نہ بوت گڑبزانکہ آ جہد چاگردی راستی (Ground Realities) ء جاہ ء مردم ءے تب ء واستیگ انت۔ آشوبی جہد کاراں پہ الم انت کہ جذبات ء احساساتانی ، لہتیں بنگی چیزاں چوت ء بہ رکین انت۔

پیسلہ سازی گوں عقل ء کنگ ء مراد ایش انت کہ آشوبی جہد کار آشوبی میدان ء تہ ء وقتی جذبات ء احساساتانی بنیات ء بجز ء پیسلہاں مہ کن انت ، بگندے وقتی ڈبھ ء راستی ء بجز ء لوٹاں وقتی دیم ء ایر بہ کن انت ء پیسلہ بہ کن انت۔ سیاست ء تہ ء پیسلہ کنگ یازورگ ء اختیار مدام لیڈرشپ ء دست ء بیت ء لیڈرشپ ہم مردم بنت ء وقتی تہ ء جذبات ء احساسات الم دار انت۔ ء لیڈرشپ ء کچ سک کم بیت بزانکہ یک لک مردم ء زند ء پیسلہ یک مردم ء دست ء بیت یا کہ یک کروڑ انسان ء پیسلہ دہ مردمانی دست ء

بیت۔ ہمے ہاتر ۽ گش آنت کہ سیاست ۽ تہ ۽ مدام پیسلہ سازی گوں عقل ۽ کنگ بہ بیت
 ، آئی ۽ بنگی سب ہمیش انت کہ یک مردے یادہ مردم وتی زاتی جذبات ۽ احساساتانی
 بنیات ۽ یک لک یا کہ یک کروڑ مردم ۽ پیسلہ ۽ مہ کنت بگندے آگوں وتی ڈیہہ ۽ راستی، وہد
 ۽ جاوہ ۽ لوٹ، گوں دلیل ۽ ریزن ۽ پیسلہ بہ کنت۔ اگاں آئی ۽ ڈیہہ ۽ راستی یا وہد ۽ جاوہ ۽
 لوٹ سروکانی زاتی جذبات ۽ احساساتانی ہلاپ ۽ انت بلئے لیڈر شپ ۽ ہماوہد ۽ لیڈر شپ
 بوت کنت کہ آاے زہرگ ۽ وارت ۽ وتی زاتی جذبات ۽ احساساتاں یک نیمگے کنت ۽
 عقل ۽ بنیات ۽ پیسلہ زورایت۔

ہمے وڑ آشوبی جہد کاراں ہرچ وڑیں جاوراں وتی جذبات ۽ احساسات یک نیمگے کنگ ۽ وتی
 ہوش ۽ حواس بر جاہ دارگی انت۔ اے گپ ۽ مراد ایش انت کہ مردم جتا جتاکیں جاوراں
 وتی جذبات ۽ احساساتاں ہماوڑ در شان کنت۔ لہتیں جاوہ ہمے وڑ بنت کہ مردم انچوہر ۽
 بیت کہ آوتی جند ۽ دارگ (کنٹرول) ۽ ڈن بیت، اے جاوہ ۽ مردم انچیں کار ہم کنت کہ
 آسر جمیں جہد ۽ تاوان دات کنت۔ ایشی ۽ ابید، لہتیں جاوراں مردم سک گل ۽ شاد بیت

، اے جاوراں مردم وتی کش ء گور ء جاوراں ء نہ چارایت ء پیسلہ زورایت کہ اے ہم
 مز نہیں تاوانے دینت ء دگہ یک جاورے ء مردم سرجم ء ترس ء آماج بیت یا کہ زور
 بیت، آجاور ء انسان ہج وٹیں پیسلہ زُرت نہ کنت۔ اے سے یں جاورانی تہ ء مردم وتی
 ہوش ء حواس ء برجاہ داشت نہ کنت، وہدے مردم وتی ہوش ء حواس ء برجاہ داشت نہ
 کنت آکدی ہم عقل ء بنیات ء پیسلہ زُرت نہ کنت۔

وہدے یک سیاسی جہد کارے وتی جذبات ء احساساتاں ہج داشت نہ کنت یا آئی ء جذبات
 ء احساسات آئی ء سیاسی زند ء سر ء اسر دور دینت گڑاود ء ردی یا زوری ء گنجائش گیش
 بنت ء ہمے وڑ ء ایشانی نفسیاتی اسر ہم روچ پہ روچ گیش بنت۔ نفسیاتی اسرانی گیش بوگ ء
 گوں گیش آنت کہ مئے نفسیاتی جیڑہ ہست آنت ء وتی سنگتتاں چہ دردواری (ہمدردی)
 زورگ ء جہد ء کن آنت۔ سنگتانی دردواری زورگ ء ہاتر ء وتی کسان کسانیں جیڑہاں ہم
 مز ن پیش دار آنت۔ چو شکہ من واب نہ کپ آں، ڈپریشن ء آماج آں، من نادارہ آں ء
 دگہ انچیں بازیں جیڑہ ء جنجال۔ اے گیانی مول ء مراد ایش نہ انت کہ جنگ ء تہ ء نفسیاتی

جیڑہ نہ بیت یا نادراہی نہ بیت، سد درسد جنگ ء تہ ء سک باز نفسیاتی نادراہی بیت بلئے اے
گپ ہم راستے کہ مرچی، باند نفسیاتی نادراہی یک شوک (فیشن) یے ہم جوڑ بوتگ۔
گیشتر یا کمتر ماگشت نہ کن ایں بلئے یک مزینں کچے ء مردم وتی سگت ء ہمبر اہاں چہ
دردواری زورگ ء ہاتر ء ہے وڑ باور کنائین انت کہ مارا مزینں نفسیاتی نادراہی ہست۔
اے دردواری زورگ ء نفسیات یک آشوبی جہد کارے ء چہ تہ ء ہلاس کنت۔ آشوبی
جہد کار سر جمیں مردم بنت، آہانی عقل ء ہوش ہرج و ہر جاہ بنت۔ آشوبی جہد کار ابیدہ
دگہ تہا ء ترس ء وتی سر جمیں زند ء کربان کن انت۔ آہرچ وڑیں اختلاف ء تنقید ء سگ
انت کن انت بلئے و ہدے آہے نادراہی یا آدت ء آماج بنت کہ وتی کسان کسانیں جیڑہاں
وتی سنگلتانی دیم ء درشان کن انت ء ہے لوٹ کن انت کہ چہ سنگلتاں مارا دردواری بے رس
ایت ء مئے نزوری ء ردیانی سر ء کس ہچ مہ گش ایت۔ چہ ہمد ء آجہد کار ء آشوبی بودشت
ہلاس بنت ء و ہدے ہمبرائی اندر ء چہ ہلاس بوان بیت۔ آشوبی جہد کار ء وتی عقل ہمنچہ
کار بندگی انت کہ آئی ء ہچ چیز پر وشت دات مہ کنت یا زور کت مہ کنت بلئے آراستی ء
نفسیاتی نادراہی ء آماج بیت گڑا آئی ء جند ء اخلاقی پرز بیت کہ جہد ء تہ ء کسان ء مزینں ہچ

وڑیں زمہ واری مہ زورایت بگندے انچو یک عام جہد کارے ۽ حساب ۽ جہد ۽ گون بہ
 بیت پرچہ کہ ہماردم نفسیاتی نادراہیانی آماج بنت یورپ ۽ تہ ۽ آمرماں ڈرائیوری اجازت
 ہم نیست، چپی ۽ کہ آہانی بارو ۽ ہمے گنگ بیت اے سرجمیں مردم نہ آنت۔ وہدے آ
 سرجمیں مردم نہ آنت آبا سید انت سرجمیں بخنزیانگل یے وتی دست ۽ مہ کن آنت کہ اودے
 کروڑاں مردمانی باندات بندوک انت۔

آسر:

چہ اے گپ ۽ گالاں الم مایک کسانیں کچے ۽ سرپد بوت ایں کہ آشوب چونیں شنے یے ۽
 یک عام مردمے ۽ چے پیم ۽ وت ۽ یک آشوبی یے جوڑکنگی انت، ہمالوٹ ۽ تقاضہ چے
 آنت کہ آئی ۽ پیلوکنگی آنت۔ انچو کہ آشوب ۽ جند ۽ بارو ۽ مابندات ۽ گپ کنگ ات ۽
 گڑسر ۽ ما آئی ۽ درورے پد اوتی ڈیھ (بلوچستان) ۽ بستار ۽ زرت کن ایں، کہ پاکستان ۽ بلوچ
 ڈگار ۽ سر ۽ کبڑہ کنگ ۽ وتی یک نظامے جوڑکنگ، یلئے ما (بلوچ) آئی ۽ یہ زوریں نظام ۽
 سرجم ہلاس کنگ ۽ وتی یک نوکیں نظامے ۽ ہاتر ۽ تحریرکی ہسیت ۽ جتائیں شکلاں جہد

کنگ ء انت۔ گوں ارزائیں گالاں ہمے پاکستانی نظام ء ہلاس کنگ ء نوکیں نظامے
 آرگ ء نام آشوب انت۔ دیمتر ء ما آشوبی جہد کار ء ہایتانی سر ء گپ ء گال کنگ ات،
 اے کلیں شے آنی متلب ایش انت، کہ یک عام کسے و ہدے کہ یک آشوبی تحریک یے ء
 آشوبی گل یے ء بہر جوڑ بیت، گڑاچہ بندات ء ہا آشوبی گل ء لوٹ ء تقاضہ آل سر پد بہ
 بیت ء آئی ء بہر جوڑ بہ بیت، تحریک ء دیم ء آؤکیں جنجال ء حیرہ آئی ء زانت ء تہ ء بہ
 بنت۔ و ہدے کہ تحریک ء بہر جوڑ بوت گڑا تحریک ء گوں سر جم ایماندار بہ بیت، وتی
 زات ء زاتی سر جمیں واہشتاں ہلاس کت بہ کنت ء وتی زات ء سر جم بہ تحریک ء آئی ء
 لوٹ ء تقاضہ آل بہا بہ دنت۔

اے گپ ء گالاں ہوار بگندے اے سرہال وتی تہ ء سر جم نہ انت۔ آئی ء سوب ایش
 انت کہ آشوب انجیں مزینں سرہال یے کہ آئی ء سر ء ھمینچہ باز نبشتہ کنگ بہ بیت
 ، ھمینچہ کم انت ء دومی ہرق جہد ء گلانی جتا جتائیں راستی انت۔ مے اے سرہال ء نبشتہ
 کنگ ء مول ء مراد برز ء نبشتہ انت کہ وتی سیاسی سر کل ء تہ ء آشوب ء آشوبی جہد کارانی

سرء گپ ء گال بندات کنگی انت۔ ماہے سرپد بتیں کہ وتی چندء نزوری یارد آشوبی رویہ
 آنی سرء مئے چندء یک تنقیدی گپ ء گالے بندات کنگ بہ بیت، اگاں ماوت وتی چندء رد
 آشوبی رویہ آنی سرء گپ ء گال مہ کن ایں گڑ ازانکہ مازوال ء نیمگ ء روگ ء انت۔
 اے سرہال ہے گپ ء گل ء بہر انت ء اے نبشتانک ء آئی ء سرجم سرپد مہ بتیں بگندے
 اے سرہال ء سرء تنقیدی گپ ء گال بندات بہ کن ایں۔

ہلاس

”آزات“ کتابک (کتابچہ) بلوچ اسٹوڈنٹس آرگنائزیشن آزاد ء میگ ء بلوچ نودر برانی آشوبی
ھیلکاری ء بہرے۔ ”آزات“ جتائیں وھداں، جتائیں سرہالانی سرء چاپ ء شنگ کنگ بیت۔ اے
کتابک ء مول ء مراد بلوچ نودر برانی میان ء آشوبی سرہالانی سرء گپ ء تران (ڈسکشن) بندات کنگ
انت۔

”آزات“ اولی کتابک ء سرہال ”آشوبی جھدکار“ انت۔ اے اولی کتابک ء تء ء آشوبی جھدکارے
جوڑ بوگ ء لوٹ چی انت ء آشوبی جھدکاران ء چے پیم بوگی انت، ایشانی سرء ء شتہ کنگ بوتگ۔
چوشکہ اے یک مزنیں سرہالے، بگندے ایشی ء سرء دگہ ہزاراں گہتریں چیز ء شتہ کنگ بوتگ۔ بلے
مے ء شتہ کنگ ء مول ء مراد مے چپ ء چاگرد ء جاو انت، مے راجی جھنر انت ء مے سیاسی چاگرد ء تء
آشوب ء آشوبی لیکہ ء سرء گپ ء ترانے بندات کنگ انت۔